



EGEMEN QAZAQSTAN

20 MAUSYIM 2023 ЖЫЛ, СЕЙСЕНБІ №115 (30594)

Мемлекетшілдік мінбері

www.egemen.kz E-mail: info@egemen.kz

FACEBOOK.COM/EGEMENKZ TWITTER.COM/EGEMENKZ

Шекаралық аумақты дамыту маңызды



Президент Қасым-Жомарт Тоқаев Шығыс Қазақстан облысының әкімі Ермек Көшербаевты қабылдады.

Кездесу барысында Мемлекет басшысы өңірдің жаңа басшысына маңызды міндеттер жүктелді. Атап айтқанда, азаматтардың тұрмыс сапасы мен әл-ауқатын одан әрі арттыру, аймақ экономикасын дамыту мәселелеріне назар аударды. Сондай-ақ өнеркәсіп, ауыл шаруашылығы, шағын және орта кәсіпкерлік салаларындағы тұрақты өсімді қамтамасыз етуді тапсырды. Сонымен қатар Мемлекет басшысы Катонқарағай, Марқакөл

аудандарын қайта құру жөнінде шешім қабылданғанына тоқталып, шекаралас аумақтағы елді мекендерді жүйелі түрде дамыту қажет екенін айтты. Президент облыс әкіміне коммуналдық инфрақұрылым нысандарын жаңғырту, жылу электр стансаларының үздіксіз жұмысын қамтамасыз ету және жылыту маусымына дайындық жұмыстарын пысықтау жөнінде тапсырма берді.

Екіжақты ынтымақтастықтың ерекше сипаты

Мемлекет басшысы Қасым-Жомарт Тоқаев Өзбекстан Республикасы Олий Мәжілісі Сенатының төрағасы Танзила Нарбаеваны қабылдады.

Кездесу барысында парламентаралық байланыстарды дамытуға және мемлекетаралық қатынастарға тың серпін беруге бағытталған қазақ-өзбек ынтымақтастығының өзекті мәселелері талқыланды.

Қасым-Жомарт Тоқаев Танзила Нарбаеваға ілтипат білдіре отырып, бүгін Астанада өткен маңызды бастама – «Орталық Азия елдері әйелдерінің диалогі» атты іс-шараны қолдағаны және жыныс белсенді қатысканы үшін ризашылығын білдірді.

Мемлекет басшысы осы алаңның бірінші отырысының қорытындысы өңірдегі өзара іс-әрекетті жандандыруға ықпал ететініне, Орталық Азиядағы гендерлік теңдік пен орнықты дамуды қамтамасыз ету бағытында ұзақмерзімді шешімдер әзір-

леуге мүмкіндік беретініне сенім білдірді.

Президент Сенат төрағасының сапары екіжақты ынтымақтастықтың ерекше сипатының жарқын көрінісі екенін және Қазақстан мен Өзбекстан арасындағы стратегиялық серіктестік пен одақтастық деңгейіне сай келетінін атап өтті.

Былтыр желтоқсан айында Өзбекстанға жасаған мемлекеттік сапарымыздың нәтижесін жоғары бағалаймыз. Биыл 3 наурызда Шымкентте өткен бейресми кездесу барысында елдеріміз арасындағы өзара іс-әрекеттің өзекті мәселелері талқыланды. Тек үкімет деңгейінде ғана жүйелі жұмыс жүргізіліп жатқан жоқ, парламентаралық дипломатия да белсенді дамып келе жатыр. Бұл – қуантарлық жайт. Сондықтан



келесі жылы екінші Парламентаралық форумның Самарқанд қаласында өткізілуін құптаймын, – деді Қасым-Жомарт Тоқаев. Оз кезегінде Танзила Нарбаева құрмет көрсеткені үшін алғыс айтып, Өзбекстан Президенті Шавкат Мирзиёевтің сәлемін жеткізді. – Сіздің басшылығыңызбен Қазақстанда жүзеге асырылып жатқан кең ауқымды реформаларды жоғары бағалаймыз. Сізді

Қазақстанның бүкіл жүйесінің саяси жаңғыруына ықпал еткен ауқымды іс-шаралардың табысты жүзеге асырылуымен құттықтағым келеді. Еліміз тура жолмен келеді және халық іске асырылып жатқан реформаларыңызды белсенді қолдайды. Біз бұған қуаныштымыз, – деді Сенат төрағасы. Кездесу соңында Мемлекет басшысы Өзбекстан Президентіне жүрежарды сәлемін жолдады.

Дінаралық диалог – рухани құндылық кепілі



Мемлекет басшысы Қасым-Жомарт Тоқаев Астана және Қазақстан митрополиті Александрды қабылдады.

Кездесу барысында Мемлекет басшысы Қазақстандағы Православ шіркеуінің мемлекет пен

конфессия арасындағы қарым-қатынасты нығайтуға, сондай-ақ рухани құндылықтар мен

дінаралық диалогті ілгерілетуге елеулі үлес қосып келе жатқанын атап өтті.

Президент ортақ күш-жігердің нәтижесінде елімізде көптеген этнос өкілдері мен түрлі дінді ұстанатын халықтар өзара тату өмір сүріп жатқанына назар аударды.

Бұл ретте Қасым-Жомарт Тоқаев Қазақстандағы Православ шіркеуінің діни қызметін қолдау мәселесінде конструктивті қарым-қатынасты сақтау маңызды екенін атап өтіп, әлеуметтік және ағартушылық бағдарламаларды дамыту қажет екенін айтты.

Өз кезегінде митрополит Александр Қазақстанды көркейту жолында бейбітшілік пен бірлікті нығайту ісін қолдайтынын жеткізді және Президентке алғаш рет қазақ тілінде жарық көрген дұға кітабын табыс етті.

Патриоттық тәрбие өзегі



Президент Қасым-Жомарт Тоқаев Бақытжан Ертаевты қабылдады. Кездесу барысында Мемлекет басшысы Бақытжан Ертаевтың өскелең ұрпаққа әскери-патриоттық тәрбие беру мәселелері жөніндегі ой-пікірін тыңдады.

Мемлекет басшысы жуырда Түркістанда өткен Ұлттық

құрылтайда Әділетті Қазақстанның негізін қалайтын Адал

азамат туралы ойларын ортаға салғанын атап өтті. Бұдан бөлек, сын сағатта басын қатерге тігіп, жанқиярлықпен ерлік танытқан, Отанына адал қызмет еткен тұлғаларды жастарға үлгі ету және қарапайым еңбек адамын дәріптеу маңызды екеніне назар аударды.

Генерал-лейтенант Бақытжан Ертаев өзі басшылық ететін «Тayelsiz Qazaqstannyn Haluq Batyrlary» қоғамдық бірлестігінің атқарып жатқан жұмыстары жөнінде баяндады. Сондай-ақ әскердегі тәрбие ісін нығайту жөнінде ұсыныстарын жеткізді.

Президент ұйымның бастамаларына мемлекет тарапынан қолдау көрсетілетінін айтты. Сонымен қатар Бақытжан Ертаевтың туелсіз Қазақстанның Қарулы Күштерін құруға елеулі еңбек сіңіргенін атап өтіп, оның ел игілігі үшін атқарып жатқан қоғамдық жұмысына табыс тіледі.

РЕСМИ

ҚАЗАҚСТАН РЕСПУБЛИКАСЫНЫҢ ЗАҢЫ

ТМД-ға қатысушы мемлекеттердің жалған тауар белгілерін және географиялық көрсеткіштерді пайдаланудың алдын алу мен жолын кесу жөніндегі ынтымақтастығы туралы келісімді ратификациялау туралы

2021 жылғы 28 мамырда Минскіде жасалған ТМД-ға қатысушы мемлекеттердің жалған тауар белгілерін және географиялық көрсеткіштерді пайдаланудың алдын алу мен жолын кесу жөніндегі ынтымақтастығы туралы келісім ратификациялансын.

Қазақстан Республикасының Президенті Қ.ТОҚАЕВ

Астана, Ақорда, 2023 жылғы 19 маусым № 11-VIII ҚРЗ

ЕЛДІК ІС

Жасай бер, жақсылық жасағы!

Ерікті болу ермек те, ерлік те емес. Қысылғанға қолұшын созу – халқымыздың қанына сіңген қасиет. Ынтылы жүректен шыққан титтей ықыласты іс үлкен түйткілдердің түйінін тарқатуы мүмкін. Өйткені жан баласына жақсылық жасау үшін асып-тасқан дәулеттің де қажеті шамалы, сәл ғана мейірім болса жеткілікті.

Арман ОКТЯБРЬ, «Egemen Qazaqstan»

Құндылықтар құлдырап, бәсекенің бәсі қызған уақытта әркім өз басымен әлек. Дегенмен

өмір ағысы қалай құбылса да, айналаға әйтеуір бір шарапатын тигізу – көп адамның көңіліндегі іс. Күнделікті өмірде кеудедегі осы бір ізгі ниетті жүзеге асырудың оңтайы есте келе

бермеуі мүмкін, ал көпшілік күш біріктірсе, «жұмыла көтерген жүк жеңіл». Халқымыздың салт-санасына сіңген үме, асар секілді игі істерді заманауи сипатқа сай түрлендіріп, бір сөзбен волонтерлік деп атап жүрміз. Мемлекет басшысының Жарлығымен елімізде 2021 жыл «Волонтер жылы» ретінде жарияланып, игі үрдіске айналды.

(Соңы 6-бетте)

НАЗАРДАҒЫ НЫСАН

Үлкен Алматы айналма жолы ашылды

Өткен аптаның соңында ел аузында «БАКАД» аталып кеткен Орталық Азиядағы ірі жол-көлік инфрақұрылымдарының бірі – Үлкен Алматы айналма автожолы (УААЖ) пайдалануға берілді.

Гүлбаршын АЙТЖАНБАЙҚЫЗЫ, «Egemen Qazaqstan»

Бұл жолдың құрылысы осыдан үш жыл бұрын түрік-корея консорциумы негізінде басталған. Жоспар бойынша жоба 2024 жылы аяқталуы керек еді. Дегенмен ауқымды әрі қарқынды жұмыстың нәтижесінде концессионер жобаны мерзімінен бұрын жүзеге асыруға қол жеткізді. Айналма жол Алматы облысының Қарасай ауданына қарасты Қырауылды



ауылынан басталып, Талғардың «Қызыл Қайратына» дейін, жалпы 14 елді мекен арқылы өтеді.

Сарапшылар аталған жоба «Батыс Еуропа – Батыс Қытай»

транзиттік дәлізінің негізгі элементіне айналады деп үміттеніп отыр.

(Соңы 7-бетте)